

# 廣東歷代詩僧簡介(十)

慧光居士

## 今音

今音字梵音，番禺人，族姓曾，原名起霖，字湛師，幼聰敏，爲邑諸生，天然禪師徒弟。平生放達任俠，形短而神奕奕，一夕豪飲，與友訣曰，今夕盡此杯中物，明日索我於金輪峯頂矣。人咸未信，先遣其妻祝髮，密製，衣械、分散書帙，作詩誌別，潛附商舸，入廬山求天老人脫白。嶺上遇華首師翁，返粵爲其落髮。乙未在棲賢登具。戊戌隨天老人還雷峯，研究祖道，幾於忘生。辛丑游羅浮，坐化華首臺上。有古鏡遺稿一卷藏於山中。

東亭留別

偶然離竹院。經月在人羣。幾夕東亭上。燃燈過夜分。雨歇長春草。窗晴見白雲。悠悠擊瓢笠。林下重期君。

秋水

湛湛浮霜葉。悠悠泛石磯。鑑形虛欲盡。觸物氣先微。鴻雁難留影。芙蓉易解衣。扁舟何處子。寒棹夜思歸。

夏夜望月

羣峯搖夜翠。當夏亦淒清。石壁分餘靄。疏林透薄明。欲到板橋去。坐聞幽澗聲。柴門開復掩。颯颯谷風生。

登滕王閣

秋深南浦一帆回。高閣臨江復壯開。孤嶼乍晴雲獨去。寒潭初靜雁飛來。廢興多少同懷古。吟眺流連總愛才。遙憶子安詞賦地。夕陽歌舞易相催。

將入匡廬留別社中諸子

十年浪跡事俱非。會向烟霞洞壑歸。瓢笠不辭行路澀。琴書長與故人違。鹿門妻子飯空盡。陽羨田廬舉手揮。此去東林勝猶在。白蓮依舊賣心稀。

羅浮山居

屏分錦繡自岩嶢。誰與秋深度鍊橋。靜夜寒林聞搗藥。高樓明月過吹簫。虎鬚遠探臨巖石。雀舌閒烹試瘳瓢。慚愧頭陀餘行苦。活泉引灌圃中苗。

陳顥菴先生讀梵音詩絕句云：豪飲偏能助俠情。俠情容易決人生。金輪峯頂高無上。丘壑尋常已暫平。吟眺流連總愛才。滕王閣句有神來。十年浪跡遺詩鏡。雲瀑秋深華首臺。

## 今沼

今沼字鍊機，番禺人，天然禪師族姪，原名暉字自昭，少饒諸生，名聞譽序，有至行，篤於友誼。庚寅喪亂，室廬妻子陷於危城，子身漂寓，深自晦匿，無復有人世意。研窮儒者之學，規行矩步，皆有準繩。晚讀楞嚴經，始灑然超脫，於是入雷峯結茅室，與友人麥具三閉關三年。時天老人居棲賢，雷峯方興土木，沼出輔旋菴湛公募化。殿宇落成，戊戌迎天老人返錫。庚子開戒，與石鑑禪師同日受具，受司記室，尋升按雲堂。師勘驗精嚴，鉗錘交下，如青天雷鳴，不可掩匿，舊習頓喪。隨杖居東官芥菴，益自淬礪，一夕坐亡，緇白爲之哀悼。沼於書無不覽，工行楷，詩長於古，尤工駢麗之辭，有全集行世，卒年四十五。

出家日自嘲

蹉跎到此竟何爲。纔撇塵緣萬事宜。已覺形容除俗態。任教顛倒落僧祇。眼昏且喜經文大。鬢禿如藏臘序卑。四十按緇誰謂老。只應精猛事吾師。

故交屈指復誰存。似我餘灰尙足論。於世已慚微友道。入山偏覺謬師恩。時擎粥鉢烟村外。閒放棕團水石根。從此名山高頂上。一憑筋力恣孤鶩。

### 宿洞山寺

秋日凌我襟。況我筇笠新。一去三十里。溪山迴無隣。始見落山泉。折折濯嶙峋。山雨昨夕霽。秀色開微皦。主人山半逢。戀犬亦逡巡。滄溟際簷溜。決瀉西崦輪。遠嶼若浮瓠。瀟氣如冶銀。淨榻息閒房。蕭瑟隨我身。境寂到深寐。所歷似前因。巢禽警霜鐘。呦鹿駭草人。鋤芋臨當煎。折枝臨當薪。夙予抱微願。安居亦行勤。少飲不吾與。聊且娛斯晨。彼石如彼泉。終與朋輩親。

### 遊寶積寺汲卓錫泉至石洞經宿而歸

山風何颼颼。墮葉擲虛閣。遠懷山月秋。顧不如疇昨。梵宇如劫餘。寒原亦凋落。數里有名泉。漈洄碧雲端。携筇探之去。石幹青若盤。入口晨露晞。劇飲不畏寒。不將軍持來。何以惠所歡。石洞隔昏鐘。明發問樵子。圍木晝曖中。枵穴仍聒耳。巖林翳漬委。霑澁踏不起。良材下維籜。詩人所爲警。稷實愁霜風。茲游况如此。安得列禦方。乘之泛我止。

### 小舟溯川至山麓宿雲路村館

夙予愛秋山。勉焉若登踐。曳楫隨迴川。望峯隨幾面。輕舸屬旋折。合杏形始見。微陽耀林麓。捨舟聊繾綣。遂造雲路峯。石門憩苔蘚。村徑有高下。茶坪或夷衍。鷄犬戀茅茨。人事遂初善。投策高崖側。解裝情已緬。虛窗對落日。孤松媚遠甸。雷壇度疏雨。名泉暗流轉。清寐漸良宵。幽懷自茲眷。

### 秋日華首臺院

山銜古寺秋。石路晚幽幽。谷掩雲移樹。鐘殘月在樓。烟蘿和露滴。風葉亂泉流。禪暇閒來往。東西溪上頭。

### 秋日書懷

夢杳海天外。心悲落葉前。多尤貽晚悔。長病託秋眠。沈日照書閣。歸潮起釣船。何須驚客鬢。潘岳二毛年。

### 關山月

朔漠秋天高。微輪耀戟毛。沙場千里白。關塞一聲號。寒徹燕山骨。先流瀚海濤。何年兵氣盡。無使戍夫勞。

### 山影

碧峯巖翠影沈沈。盡日晴軒得半陰。不劈嶙峋圖屋角。宿銜空翠落波心。似因臨寫窺高下。欲仰儀型想靜深。遙憶香爐脚邊寺。一巒殘照倚風吟。

### 羅浮冲虛觀

仙宮長掩烟霞裏。絕磴纒攀屨欲輕。龍虎氣藏山殿冷。蝌魚書壑石壇傾。胎禽日永棲還去。靈藥林深萎又生。猶有成鱗兩松樹。側臨丹井勢崢嶸。

### 千佛道場卽事

錦角旛旛噴沫烟。梅林龍象率陀仙。觀成萬象金光湧。禮遍千名梵響圓。花樹齊口催百鳥。香渠分供出諸天。蕭郎夙慧多生事。眼見池開上品蓮。

### 南海神祠

百川亦滙歸南海。望秩靈祠自歷朝。石鐫鳳書苔蘚駁。像垂龍袞水雲飄。波鳴海市晴輪稅。霧捲鮫宮夜貢綃。日暮商飈動林木。鼓聲催起海門潮。

### 宿華首閣

石路迴斜樹影重。月臨高閣罷昏鐘。山銜古寺秋初半。葉滿虛廊露正濃。南嶺宿雲籠翠草。東溪瀑水映疏松。睡醒却悟身何處。四百峯中此一峯。

陳顛菴先生讀鍊機詩絕句云：楚潭峽峽幾相思。寥落靈均一帙辭。四十年來歸未得。嘔心時欲斷殘絲。（鍊機詩學長吉）燕辭巢去雁驚霜。衰柳殘暉人斷腸。掩卷秋寮寫風景。未嘗糟粕到齊梁。（鍊機古詩好爲齊梁體）四百峯頭最有情。故交屈指黯然驚。年來文字忘懷處。月共川潮夜夜平。

### 今從今莖

今从字淨起，番禺人，族姓李，二嚴大師長子，原名雲子字山農，明經，與弟龍子皆有文名。二嚴卽詞人李烟客，慷慨重節義，販華首脫白。从素持梵行。居俗時與天然禪師結淨社於天關，文章道學皆有所師法。禪師出世入匡廬，从亦棄章縫隱於柏堂故里，與其弟教授生徒。丙午始隨禪師薙染，命典教授，俾諸後

學請益焉。从質樸不事華飾，與人言真率無少迴護，人雖嚴憚，始終愛其直諒，蓋儒之君子，禪之耆宿也。

贈何淨德  
經術違時早避秦。遨遊早已得閒身。庭前雙鳳能娛老。雲外飛鴻不傍人。居士久推蓮社長。古風猶見葛天民。門臨江水通漁父。大石垂竿學渭濱。

東官留別諸舊友

亂來人事益蕭條。八載重過意未消。泉路故交留語別。陌頭公子倦行佻。萬家痛飲荏苒恨。百里愁看草木彫。此別幾能相聚首。遲居應立虎溪橋。

今莖字具五，淨起從公之弟，少舉已卯孝廉，原名龍子字田叔。兄弟皆從天然禪師講學課藝，因其父二嚴大師出世長往，不能踪跡，莖亦退隱山林。家無半畝之入，携妻孥因館穀就食，野服芒鞋，蕭然自足。辛丑癸丑染疫受具，超悟出羣，爲天老人所期許。素有宿疾，不獲究竟一大事，諸山惜之。

祝髮詩  
萬事烟銷不復言。此身何幸得生存。辭家直欲超三界。焚草無由到九閻。雲外香鴻離竭澤。水邊鴿鳥喜依原。曹溪咫尺門前路。一上雷峯溯河源。

陳顥菴先生讀淨起具五詩絕句云：蕭條人事廢吟哦。間有烽塵涕淚歌。欲問虎溪橋下水。爲何飲恨萬家多。家風離合即多師。雖吝光陰靳素期。大事且難圖究竟。諸山都爲老人悲。

## 今離 今如

今離字即覺，新會人，族姓黃，原名尙源，邑諸生，品行端恪，嘖笑不苟，傳江門之學，學者多宗之。聞天然禪師闡法於詞林，竭請辯論儒釋宗旨，披剝屢日，不覺自屈，即日皈依落髮，家人生徒猶未知也。戊子受具，隨杖居雷峯，爲一家綱維。頃充華首棲賢監院，再領雷峯監院。離戒律精嚴，博通三乘教典，行住坐臥，默誦不輟，方便度人，一出於至誠，慈和之氣，達於眉宇，望而知爲有道尊宿。癸丑住棲賢省觀，老人許還雷峯，付以

大法，遇咯血病作，未承記別，以是秋示寂廬山。

送石鑑西堂領衆棲賢

榔櫟橫挑別海濱。百千龍象送行塵。名山恰遂棲遲志。祖席全憑辦道身。吐棄名言成玉屑。斬新條令闕荆榛。聞風定見如川至。多結茅茨莫厭貧。

今如字眞佛、諸生，即覺之弟，角子菴禪師之父，性慈和，簡於言笑，博通教典。癸巳皈天老人出世登具，隨杖居棲賢。乙未復入嶺，執侍華青師翁，左右服勤。後往來廬山二十餘年，依天老人會下，深契道妙，與石鑑禪師即覺離公爲性命之友。年臘既深，歸老雷峯，一夕坐脫。

送石鑑西堂領衆棲賢

入山誰不羨名林。君獨緣深念更殷。已許衲僧同築屋。更搜居士舊遺文。石人峯送階前雪。五老門深嶺上雲。此後不須愁寂寞。彌天花雨日紛紛。

陳顥菴先生讀即覺眞佛詩絕句云：黃家兄弟節逾堅。學自江門易入禪。華首紛紛花雨下。池塘春草夢芊綿。

## 本刊收支報告

### 收入：

上期結存	一、二八九·七五
本期捐款	二、二二三·〇〇
總計收入	三、四〇三·八五

### 支出：

第九期印刷費	一、八三九·九〇
第九期郵寄費	三七〇·九五
第九期雜費	二六五·〇〇
總計支出	二、四七五·八五

### 結存：

九二八·〇〇

## 捐款鳴謝

性仁法師	港幣壹百元
黃長茂居士	港幣壹百元
龍寬勝居士	港幣壹拾元
張文舫居士	(郵票代金)港幣壹拾元
招國基居士	(郵票代金)港幣叁元
妙法寺	港幣貳元

內明雜誌社謹啓